

Papia 1 Pita da Mandagit

But piso gen

Pita unun Yesu dakon pañdet 12 kabikon nani kinda da on papia unun Yesu yolyol amin jigi morapmi paba unun dakon nandan gadatni panṭeban ak do mandagit. Yaṅ yosok, Yesu yolyol miṅat amin Yesu Kristo dakon Gen Bin Tagisi do aeni nandani dosi yosok. Yesu kimagek kimoron da pidagit, aṅek aeni tobil ap do yaṅ teban tok agit. Yaṅ teban tok unun agit unun do nandanek apjak do jomjom ani.

Asi, Yesu yolyol amin jigi paṅ, mani jigi unun nandan gadatni paṅkilit do noman toṅ. Do nandan gadat tebaisi abidan kimagek wigi Kristo da aeni tobil apjak bisapmon wigakwan unun bisapmon tomni tagisi timitdaṅ.

No Rule Piṅkop dakon miṅat amin kabisi agimaṅ, do aṅpak tagisi baṅ aṅek, yo tagisi abidok do nandanek jomjom amaṅ unun abidoneṅ

(Kilapmi 1.1–2.10)

1 ¹ Nak Pita, Yesu Kristo dakon yabekbini. Papia on mandisat unun Piṅkop dakon miṅat aminyo ji uwal da jigi daba waserṅ ki provins Pontus, ae Galesia, ae Kapadosia, ae Esia, ae Bitinia unudon kiṅ kiṅ awit da ekwaṅ ji do mandisat.

² “Kalipsigwan Piṅkop Dat da ji kili nandan damiṅek iyṅ dakon miṅat aminyo dagoni do kili manjigit. Unun Telagi Wup da paṅpuluganban egip egipji kisi Piṅkop do parek imiṅek telak taneṅ Yesu Kristo dakon gen yol kimotni, aṅakwa Yesu dakon yawini da ji sugaṅ depban Piṅkop da dabilon gwaljigi mini ani, yaṅ do aṅek ji kili manjigit.

Piṅkop da nandan yawot madepsi aṅ damiṅek butji paṅyawot aban yaworisi tosak do bisit asat.

Egip egip tagisi da nin do Kwen Kokupmon jomaṅek tosak

³ Nin Piṅkop dakon man aṅkisineṅ, unun Amin Taginin Yesu Kristo dakon Piṅkopni ae Datni. Nin do bupmi madepsi nandan nimgut, do

^a 1.2 Ro 8.29; 2Tes 2.13

Yesu Kristo kimakbi tamokon nan aban pidagit, anek unun kosiron da Pinjkop da egip egip kalugi nimgut. Ae egip egip kalugi wagil tagisi nin do anoman agit unun abidoneŋsi yan nandaŋek jomjom anek ekwaman. ^{4b}Nin Kwen Kokup dakon egip egip abidoneŋ do kili manjigit. Egip egip unun aripmi dima tasik togi, ae Pinjkop da dabilon gwaljigi minisi, ae mudok mudogi minisi. Egip egip unun Pinjkop gat kisi Kwen Kokup egipneŋ bisapmon abidoneŋ do Pinjkop da kili manjigit. ^{5c}Kristo nandan gadan iminjakwa Pinjkop da tapmim madepnikon da ji panjutnosok. Unun da ji yokwikon ban timigek panpulanganban tagisi egipni do nandisak, ae yo unun ak do nandisak unun mibi bisapmon nomansi aban teŋteŋokdisak. ^{6d}Pinjkop da yo unun akdisak, ji unun do nandaŋek kisik kisik an. Mani abisok bisap pisipmisok dogin panjkilit mibili mibili da noman tan daminjakwa tepmi pan.

^{7e}Pinjkop da ji dakon nandan gadat anjkilik kok do anek panjkilit yum pindagakwan aban. Nin nandaman, gol unun yo tagisi, mani gol unun yo tasik togi, do ji dakon nandan gadat da gol yapmanjak ae wagil tagisisi. Amin da gol unun asi gol bo yan do kindapmon sojek anjkilik koŋ. Do nandani, panjkilit mibili mibili altaŋ daba nandan gadatji tebaisi sigin tosak kaŋ, mibi gildaron Yesu Kristo noman altosak bisapmon ji do kisik kisik nandan daminjek man madep damdisak.

^{8f}Ji Yesu dima kawit, mani but dasi galak tan iman. Abisok dima koŋ, mani nandan gadan iminjek but galaksi nandan. But galak unun da miktim dakon kisik kisik morap yapman mudosok. Unun gen kaginin da aripmi dima yan teŋteŋan mudogi. Dimasi. ⁹Kristo nandan gadan iman do anek Pinjkop da ji yokwikon ban timikdak.

^{10g}Kalip kombi amin da Pinjkop da abisok nandan yawok daminjek jikon yo tagisi akdisak unun do yan teŋteŋok awit. Pinjkop da nin yokwikon ban timitdisak unun dakon mibili nandak do pi madepsi awit. ^{11h}Kristo dakon Wup da kombi amin da butgwan yigek gen kagakon da Kristo da tepmi mibili mibili pakdisak anek don man madep pakdisak unun do yankwok agit. Anjakwan kombi amin da nandawit, “Ni bisapmon nin yokwikon ban timitjak amin apjak?” ae “Unun bisapmon ni yo da noman tokdisak?” ¹²Mani, Pinjkop da yan yoligit, yo morap noman tokdan do kombi gen yawit, unun da bisapmon dima noman toni. Abisok ekwan amin ji da bisapmon noman toni do yawit. Telagi Wup Pinjkop da Kwen Kokup nan yabekban pigit unun da amin tapmim yoban Gen Bin Tagisi yan teŋteŋok anek Pinjkop da yo asak do kili dayiwit. Anelo kisi Pinjkop da ji do yo tagisi agit unun pindak nandanjo akdo tagisi nandan.

^b 1.4 Kol 1.12 ^c 1.5 Jn 10.28; 17.11 ^d 1.6 Jem 1.2; 1Pi 5.10 ^e 1.7 YT 17.3; Sek 13.9; Mal 3.3; Jem 1.3 ^f 1.8 Jn 20.29; 2Ko 5.7 ^g 1.10 Mt 13.16-17 ^h 1.11 Kap 22; Ais 53; Lk 24.26-27

Pinjkop da telagi egipneŋ do yosok

¹³Do bisapmi bisapmi nandak nandakji si paŋtagap aŋek egipni, aŋek disi do kila tagisi aŋek egipni. Yesu Kristo da noman altosak bisapmon Pinjkop da nandaŋ yawok damaŋek jikon yo tagisi uŋun akdisak uŋun do nandaŋ gadat tebaisi aŋek jomjom ani. ¹⁴ⁱMinjat monjiyo da gen guramit aŋ uŋuderŋ ani. Kalip nandak nandakji mini, do galaktok yokwi mibili mibili yolgwit, mani abisok aŋpak uŋun dima yolni. ¹⁵Pinjkop da ji kili yaŋ damgut, uŋun telagi, do yo morap anikon jiyo kisi telagi egipni. ¹⁶^jNido Pinjkop dakon papia da yaŋ yosok:

“Ji telagi egipni, nido nak telagi egisat.”

Tomni madep naŋ nin yumaŋ nagit

¹⁷^kPinjkop bisit iyineŋ “Dat” yaŋ iyaŋ. Dat uŋun da man timikgamaŋ uŋun do nandaŋek kokwin dima asak. Nin kalonŋ kalonŋ da aŋpak amaŋ uŋun pindagek nin kokwin asak. Do on miktimon egipni bisap morapmon, on miktim uŋun nin dakon kokupsinin yaŋ dima nandani, ae Pinjkop do pasalek uŋun da yonŋamgwan gin egipni. ¹⁸Nido disi nandaŋ, kalip babakji da mibili mini dima nandaŋ piŋaŋek egipgwit jiyo kisi yaŋgin egipgwit, mani Pinjkop da ji yumaŋ naŋek uŋun aŋpagon baŋ pulugaŋ depgut. Ae ji yum do miktim dakon yo si tasik togi silwa bo gol baŋ dima yumaŋ nagit. ¹⁹^lKristo dakon yawi, tomni wukwisi naŋ yumaŋ nagit. Kristo uŋun sipsip moniŋ gwaljiŋi minisi. ²⁰^mPinjkop miktim dima wasagit bisapmon, Kristo da ji yumaŋ nosak do kili manjiŋit, ae abisok mibi bisap on ekwamaŋon, Pinjkop da nin paŋpulugosak do Kristo yipban kili altaŋ teŋteŋagit. ²¹ⁿUŋun da ji paŋpulugaŋban Pinjkop nandaŋ gadaŋ imgwit. Uŋun Pinjkop da Kristo kimakbi tamokon naŋ aban pidaŋban man madep imgut. Do ji Pinjkop do nandaŋ gadat aŋek yo ak do yaŋ teban tok agit uŋun do jomjom aŋ.

Nin amin do but dasi galak taŋ yomneŋ

²²^oJi gen bami yolgwit, yaŋ aŋek disi Pinjkop da dabilon gwaljiŋi mini awit. Aŋek Pinjkop dakon minjat aminyo diwari but dasi galak taŋ yomaŋ. Do abisok pi madepsi aŋ kimagek but dasi galak taŋ yomiŋ kimotni. ²³Ji yaŋ ani, nido egip egip kalugi Pinjkopmon abidawit uŋun kimot kimori mini. Pinjkop dakon gen dagok dagogi mini uŋun da egip egip kalugi uŋun aŋalon asak. ²⁴^pPinjkop da papiakon gen yaŋ tosok:

“Minjat amin morap joŋ da yaŋ bisap dubak dima ekwaŋ,

ⁱ 1.14 Ro 12.2; Ep 2.3; 4.17-18 ^j 1.16 MS 11.44-45; Mt 5.48 ^k 1.17 Ro 2.11; PA 2.23

^l 1.19 Ya 20.28; Ibr 9.12-14 ^m 1.20 Ep 1.4; 2Ti 1.9-10 ⁿ 1.21 Jn 14.6; Ro 5.1-2

^o 1.22 Jn 13.34; Ro 12.10 ^p 1.24-25 Ais 40.6-8

ae man madepni da jareŋ da yaŋ tepmi biripmigi moŋ.

²⁵ Mani Piŋkop dakon gen toktogisi taŋ aŋaŋ kisak.”

Gen uŋun jikon Gen Bin Tagisi yaŋ teŋteŋawit uŋun.

2 ¹Ji altok altok kalugi kili awit, do aŋpak yokwi morap yipmaŋ mudoni. Top yogok aŋpak gat, ae jamba but aŋpak morap gat, ae tagisi ekwaŋ amin do nandaba yokwi tok gat, ae yaŋba yokwi tok morap gat uŋun kisi yipmaŋ mudoni. ²Monji ŋakŋak kalugi mum do galagi madepsi nandaŋ, uŋun da tilak mum tagisi, ae uŋudon yo yokwi kinda dima tosoŋ, uŋun Piŋkopmon da abisak uŋun timit do galagi madepsi nandani. Mum uŋun da wupji aŋpulugaŋban Piŋkop da egip egip kalugi uŋun damguron tagaŋ madep ani ae tapmim pani, aŋek Piŋkop gat tagisi egipni. ³Yaŋ ani, nido Piŋkop da aŋpak ninon asak uŋun kili aŋkilik kawit, aŋek Amin Tagi uŋun tagisi yaŋ kili nandawit.

Amin Tagi uŋun gwak egip egipmi toŋ

⁴Ji Amin Tagikon apni. Uŋun gwak egip egipmi toŋ yombem kinda. Miŋat aminyo da kaŋba yokwi aban maba kigit, mani Piŋkop da kili manjigit, aŋek kaŋban tagisisi agit.

⁵Jiyo kisi gwak egip egipmi toŋ yombem, ae Telagi Wup da tapmimon Piŋkop da paŋpulugaŋban iyi dakon yutni dagoŋ. Yaŋ aban ji Piŋkop dakon telagi mukwa sogok amin kabini egek Yesu Kristo da manon paret ani. Uŋun paret Telagi Wup da ji paŋtagap aban Piŋkop da paret si galak tosoŋ asak. ⁶Uŋun do Piŋkop da papiakon gen kinda yaŋ tosoŋ:

“Nandani, yut kodigikon gwak teban tip kindanaŋ tidosot uŋun nak da kili manjigim.

Uŋun gwak tagisi ae tebaisi.

Uŋun abisok yipbo Saion kokup papmon tosoŋ.

Uŋun do nandaŋ gadaŋ imni amin mayaktok aripmi dima pakdaŋ.”

⁷Ji nandaŋ gadat aŋ miŋat aminyo yaŋsi nandaŋ, Kristo uŋun gwak wagil tagisisi. Mani nandaŋ gadat dima aŋ amin, uŋun do Piŋkop da papiakon gen yaŋ tosoŋ:

“Yut agak amin da gwak yokwi yaŋ yaŋek maba kigit, uŋun gwak tip kinda naŋ tidawit da akdak.”

⁸Ae gen kinda yaŋ tosoŋ:

“Uŋun da tip da yaŋ kosit obanikon tosoŋ, do amin morapmi kandapmi tidaneŋ piligi pagek tasik tokdaŋ.”

Uŋun Piŋkop dakon gen abiŋ yipmaŋgaŋ, do kandapmi tidaneŋ piligi pokgoŋ. Kalip Piŋkop da yaŋ ani do kili manjigit.

¹ 2.1 Ep 4.22; Jem 1.21 [†] 2.3 Kap 34.8 [§] 2.5 Ep 2.21-22; PA 1.6 [†] 2.6 Ais 28.16;
Ep 2.20 ^u 2.7 Kap 118.22 ^v 2.8 Ais 8.14

⁹Mani, Piŋkop da ji kili manjigit. Ji Kila Amin Madep dakon telagi mukwa sogok amin kabini ekwaŋ. Ji Piŋkop iyi dakon miŋat amin kabinisi ekwaŋ. Egek jikon yo tagisi morap agit uŋun dakon yaŋ tenjenok ani do yaŋ damgut. Pilin tuk yipmaŋ degek tenjenikon apni do yaŋ damgut. ¹⁰Kalip Piŋkop dakon miŋat aminyo dima egipgwit, mani abisok miŋat amin kabinisi ekwaŋ. Kalip Piŋkop dakon bupmini dima abidawit, mani abisok kili abidaŋ.

**No Rule Miŋat amin diwari da binapmon pilik bamok
kilegisi aneŋ**
(*Kilapmi 2.11–3.22*)

Nin Piŋkop dakon oman monjisi egipneŋ

¹¹Notnonisi, ji on miktimon kokup ŋwakaŋwarikon amin da yaŋ ekwaŋ, ae binap amin yombem. Do yaŋsi dayisat, ji but kalip dakon galaktok yokwi manji yomni. Uŋun da wupji abiŋ yip do emat asak. ¹²Ji Piŋkop dima nandaŋ imaŋ amin da binapmon pilik bamok kilegisi ani. Asi, gulusuŋ aŋ do gen yaŋ damdaŋ, mani aŋpakji kilegi koni do don Piŋkop da miŋat aminyo gen pikon yop do apjak bisapmon Piŋkop dakon man aŋkisikdaŋ.

¹³Gapman mibili mibili dakon geni guramitni, nido Amin Tagi da yaŋ ani do nandisak. Kila amin madep da ji dakon wukwisi egisak do geni guramitni, ¹⁴ae provins dakon gapman dakon mibiltok amini kisi dakon geni guramitni. Kila amin madep da uŋun amin yabegek aŋpak yokwi aŋ amin do kobogi yokwi aŋyomni, ae aŋpak kilegi aŋ amin dakon man pawigini do yopgut da ekwaŋ. ¹⁵Piŋkop da aŋpak tagisi baŋgin ani do nandisak. Yaŋ aŋek kaŋdo nandaŋ kokwini tagi dima amin da gen kagani sopmaŋek gen dima yaŋ damni. ¹⁶Ji miŋat aminyo pulugaŋkwi da yaŋ egipni. Mani “nin pulugaŋbi” yaŋ nandaŋek kiŋ aŋpak yokwi mibili mibili di abam. Piŋkop dakon oman monji da yaŋ egipni. ¹⁷Amin morap kisi do nandaba wukwan yomni, aŋek Piŋkop dakon miŋat aminyo diwari do but dasi galak taŋ yomni. Piŋkop do si pasalek egipni. Aŋek kila amin madep do man madep imni.

Nin Yesu Kristo dakon aŋpak yolek tepmi panen

¹⁸Oman monji ji kila aminji dakon piŋbini egek nandaba wukwan yomni. Nak kila amin tagisi ji do yo yawori aŋdamaŋ uŋun dogin dima yosot. Kila amin yo yokwi aŋdamaŋ uŋun kisi dakon piŋbini egipni.

^w 2.9 GT 7.6; 14.2; Ais 9.2; Ya 26.18; Ep 5.8 ^x 2.10 Os 2.23 ^y 2.11 Gal 5.17,24
^z 2.12 Mt 5.16 ^a 2.13 Tit 3.1 ^b 2.15 1Pi 3.16 ^c 2.17 Ro 12.10 ^d 2.18 Ep 6.5

¹⁹Piŋkop dakon galaktok yolakwa isal dogin tepmi daba tepmi uŋun tagi pamaŋ yaŋ nandani kaŋ, Piŋkop da uŋun do tagisi nandakdisak. ²⁰^eMani aŋpak yokwi aŋakwa dikba tepmi pani kaŋ, Piŋkop da ji do nandaban tagi asak? Uŋun dima. Mani aŋpak tagi baŋ aŋakwa dikba uŋun do tepmi pani kaŋ, Piŋkop da yaŋ do galak tosok. ²¹^fPiŋkop da aŋpak uŋuden yolni do yaŋ damgut, nido Kristo ji paŋpulugok do tepmi pagit. Ji da yolni do aŋpak uŋun kili doligit.

²² ^g“Uŋun yokwi kinda dima agit,

ae top genyo kisi kinda dima yagit.”

²³^hAmin da ibipgwit, mani kobogi dima yobipgut. Tepmi pagit, mani paŋupbal ak do dima yagit. Uŋun iyi naŋ Piŋkop yo morap kokwin kilegisi agak amin da kisiron yipgut. ²⁴ⁱKristo tilak kindapmon akgit aŋek giptimni naŋ nin dakon yokwinin imekgit. Yokwi morap yipmaŋ mudaneŋ aŋpak kilegi yol kimotneŋ mibili yaŋ do aŋek agit. Giptimni obisi aŋagakwa tepmi pagit uŋun da ji paŋmilip agit. ²⁵^jJi kisi morap sipsip kinda pasilgit da dima nandaŋ pisaŋek agisak uŋun da tilak agipgwit. Mani abisok Sipsip Kila Amin Tagisikon tobil apgwit. Uŋun wupji dakon Kila Amin Tagisi.

Miŋat eyo dakon gen

3 ¹^kUŋudenŋ gin, miŋat eni toŋ uŋun esi dakon piŋbi egipni. Ae uŋun kabikon wili diwari Piŋkop dakon gen dima guramikgaŋ kaŋ, miŋatni ji but tobil ani do gen dima yaŋakwa aŋpakji tagisi baŋgin pindagek but tobil tagi ani. ²Nido, miŋat ji dandaba pilik bamok kilegisi aŋek piŋbisi ekwaŋ.

³^lMiŋat ji amin da dandaba tagisi ani yaŋ do busuŋji dima paŋtilim ani, ae giptimji gol baŋ dima paŋtilim ani, ae imal tagisi baŋ dima pani. ⁴Tilim dima tasik togi baŋ but kagasi paŋtilim ani. Tilim uŋun aŋpak yaworisi ae tayaŋgok egip egip. Aŋpak uŋuden Piŋkop da dabilon tagisisi. ⁵Aŋpak uŋuden do galak toni. Nido kalip bisapmon miŋat telagi egek Piŋkop da yo tagisi yom do yaŋ teban tok aŋyomgut uŋun do jomjom aŋek uŋun tilim pawit. Aŋek eni dakon piŋbini egipgwit. ⁶^mSara uŋun aŋpak yolek Abraham dakon gen guramigek amin madepno yaŋ iyigit. Ae ji aŋpak kilegisi yolek yo kinda do dima pasolni kaŋ, ji uŋun Sara dakon gwakni.

⁷ⁿUŋudenŋ gin, wili miŋatni toŋ, ji nandak nandak tagisi baŋ yolek miŋatji gat tagisi yitni. Miŋat dakon tapmim uŋun wili dakon tapmim yombem dima, uŋun madep dima, mani miŋatyo kisi egip egip kalugi

^e 2.20 1Pi 3.14,17 ^f 2.21 Mt 16.24; Jn 13.15 ^g 2.22 Ais 53.9 ^h 2.23 Ais 53.7;
1Pi 3.9 ⁱ 2.24 Ais 53.5-6; Ro 6.11 ^j 2.25 Esi 34.5-6; Mt 9.36; Jn 10.14; Ibr 13.20-21
^k 3.1 Ep 5.22 ^l 3.3 1Ti 2.9 ^m 3.6 WW 18.12 ⁿ 3.7 Ep 5.25

Piŋkop da butgalak do nimisak unun kili abidawit, do ji miŋatji do nandaba wikwan yomiŋek paŋpulugaŋek aŋpak tagisi baŋ aŋyomiŋ kimotni. Aŋpak unun yolek ani kaŋ, yo kinda da ji dakon bisit do kosit sopsop dima akdisak.

Bisapmi bisapmi amin do aŋpak tagisi aŋ yomneŋ

⁸Gen on paŋdagok do yaŋ yosot. Ji morap kisi but kalon egek amin morap kisi do bupmi nandaŋ yomni. Piŋkop dakon miŋat aminyo diwari do but dasi galak taŋ yomiŋek nandaŋ yawok yomiŋek disi do nandaba pisak. ⁹Amin da yokwi aŋ daba kaŋ, kobogi do yokwi dima aŋ yomni. Ae yaŋba yokwi tok aŋ daba kaŋ, kobogi do yaŋba yokwi tok dima aŋ yomni. Kobogi do Piŋkop da yo tagisi aŋyomjak do bisit ani. Piŋkop da ji yaŋ aŋek disi gisam timitni do yaŋ damgut. ¹⁰°Piŋkop gen papiakon gen yaŋ tosok:

“Amin kinda egip egipni tagisi noman taŋakwan bisap tagisi kok do nandisak kaŋ, unun amin gen yokwi dima yosak, ae top dima yosak.

- 11 Unun aŋpak yokwi morap manji yomiŋek, aŋpak tagisi baŋgin asak.

Unun amin gat but kalon ak do dakon pi aŋ kimotjak.

- 12 Nido, Amin Tagi da amin kilegi kilani aŋek bisitni do mirak yopmaŋdak,
mani yokwi pakpak do nandaban yokwi taŋ yomisak.”

Aŋpak tagi aneŋ dakon tepmi tagi panen

¹³Ji aŋpak tagisi tebai yol kimagek ani kaŋ, namin da yo yokwi aŋ damjak? ¹⁴°Mani aŋpak tagisi aŋek unun do tepmi pani kaŋ, Piŋkop da yo tagisi aŋ damdisak, do pasol pasol dima ani, ae nandaba kik dima ani. ¹⁵Butjikon da Kristo kalon naŋgin yipba Amin Tagisi egipjak. Ae yo tagisi do jomjom aŋ unun dakon mibili do dayaŋba kaŋ, bisapmi bisapmi kobogi yoyik do tagap tok aŋ kimotni. ¹⁶°Mani geni kobogi yawori ae aŋpak tagisikon da paŋtobil yomni. Ae Piŋkop da dabilon kilegisi egipni. Yaŋ aba Kristo yol do aŋek aŋpak tagisi aŋakwa gen yokwi dayaŋ amin unun mayagi pakdaŋ. ¹⁷Aŋpak tagisi aŋakwa unun do amin da jigŋi daba tepmi pani kaŋ, Piŋkop da ji do tagisi nandakdisak. Mani aŋpak yokwi aŋek unun dakon tepmi timitneŋ kaŋ, unun da yo yokwisi asak.

Kristo da nin yokwikon baŋ timit do kimot aŋek ae pidagit

¹⁸Kristo unun amin kilegisi, mani yokwi pakpak miŋat aminyo dakon tamo abidaŋek yokwini wiririgek Piŋkopmon timik paŋkik do aŋek

° 3.10-12 Kap 34.12-16 P 3.14 Ais 8.12-13; Mt 5.10; 1Pi 2.20; 4.14 ¶ 3.16 1Pi 2.12

kimakgit. Uñun bisap kalonj kinda kimakgit, ae kinda gat dima kimotjak. Uñun miktim aminsi da ekwan amin da anjakba kimakgit, mani Telagi Wup da tapmimon da pidagit da egisak. ¹⁹Uñun kinj wup dam tebanon egipgwit uñun do Piñkop gen yanj tenjeran yomgut. ²⁰Wup uñun da kalip Noa da bisapmon Piñkop gen abin yipgwit. Noa da bisapmon anpak yokwi madepsi awit, mani Piñkop da kobogi tepmi dima yomgut. Uñun butni yawori tanjakwan jomjom anegakwan wigi Noa da tap wakgani wasanj mudagit. Anjek minjat aminyo kalonjisok 8 kabi dagin tap wakgakon wigakwa pakbi madep da timik panjinakwa Piñkop da yokwikon banj timikban tagisi egipgwit. ²¹Pakbi uñun da telagi pakbi sogok dakon tilak asak. Piñkop da ji yokwikon banj timit do telagi pakbikon banj timikdak. Telagi pakbi uñun giptim garak wiriritjak do dima, uñun Piñkop da dabilon gwaljigi mini egip do dakon tilak asak. Ji yokwikon banj timit do Piñkop da Yesu Kristo kimoron nanj aban pidagit. ²²Ae Kristo Kwen Kokup kili wigigit da abisok Piñkop da amin tet do yikdak. Yigakwan anjelo ae kila amin madep, ae yo morap tapmimi tonj uñun da piñbini ekwanj.

No Rule Panjilit madepsi da panmuwukbikon noman tanj yoba tepmi panj (*Kilapmi 4–5*)

But kalip dakon anpak yipmanj mudonej

4 ¹Ae Kristo giptim timnikon da tepmi pagit, do nandak nandak uñun abidagit jiyo yanj gin abidanj kimotni. Nido, amin kinda giptim timnikon da tepmi pagit kanj, uñun amin yokwi dakon anpak kili yipmanj dekgit. ²Ae miktimon egisak bisapmon but kalip dakon anpak dima yoldak, Piñkop dakon galaktok banjin yoldisak. ³Ji but kalip dakon anpagon aripmisi agipgwit, anjek Piñkop dima nandanj imanj amin da anpak anj uñun ak do galagisi nandawit. Anpak uñun, yumabi anpak mibili mibili, ae pakbi teban nanjek but upbal agak, ae jap pakbiyo madepsi anjek pakbi teban morapmi nanjek anpak yokwi agak, ae anpak wagil yokwisi kinda uñun kokup kidat do gawak yomyom anpak, uñun anpak morap awit. ⁴Abisok Piñkop dima nandanj imanj amin gat anpak yokwi mibili mibili uñun sanbej yoba dima anj, anjakwa uñun do wiripdagek pidanj gen yokwi dayanj. ⁵Mani don gen pikon iyi agek mibili nido anpak uñun awit uñun do yokdanj. Piñkop da amin si ekwanj gat, ae amin kili kimakgwit gat kisi anpakni kokwin ak do kili tagap tak. ⁶Mibili yanj do anjek minjat aminyo uñun kili kimakgwit uñun dima kimagek Gen

r 3.20 WW 6–7 s 4.1 Ro 6.2,7 t 4.3 Ep 2.2-3 u 4.5 Ya 10.42

Bin Tagisi nandawit. Asi, yokwi pakpak da kimokgorj ujudenj yokwi awit dakon kobogi do kimot awit, mani Piŋkop da iyi yombem wup egipni do nandagit do Kristo dakon Gen Bin Tagisi nandawit.

Piŋkop da but galak do yo nimisak ujun pi tagisi yomnenj

⁷Yo morap pasildan dakon bisap kili kapmat toso. Do bisit ak do disi do kila anek dipmin dima pagak kalugi egipni. ⁸“Ae yo madepsi kinda, ji Piŋkop dakon miŋat aminyo diwari do but dasi galak tanj yomyom anpak tebaisi abidoni. Yanj ani kanj, amin da yokwi anj daba diwarini tagi yopni. ⁹“Ae Piŋkop dakon miŋat aminyo diwari apba ji gat egipni kanj, but galagon da kilani tagisi ankimotni.

¹⁰Piŋkop da ji kalonj kalonj do but galak dakon yo damgut, do ji kalonj kalonj Piŋkop dakon oman monji tagisi da egek, ni pi ani do tapmim damgut ujun anek amin diwari panpulugoni. ¹¹Amin kinda Piŋkop gen yanj tenjenok pi abidagit kanj, Piŋkop da iyi yosok yanj nandanej gen yosak. Ae amin kinda amin panpulugok pi asak kanj, ujun amin Piŋkop da tapmim imisak ujun da aripmon pi ujun anj kimotjak. Yanj anakwa miŋat aminyo da yo morap ani ujun pindatni, anek Yesu Kristo da manon Piŋkop dakon man anjisini. Ujun man madepni ae tapmimni dagok dagogi mini tanj ananj kisak. Ujun asi.

Kristo da tepmi pagit ujudenj, tepmi pak do but galaksi nandanenj

¹²Notnonisi, panjililit kinda kindap da yanj jikon noman toso. Mani ji wuripdagek yo njwaknjwarisi kinda da noman tanj nimisak yanj dima nandani. ¹³“Ujun panjiliron ji Kristo da tepmi pagit ujudenj panj, do kisik kisik ani. Ae Kristo dakon tilimni altanj tenjenosak bisapmon ji kisik kisik madepsi anek butji tagisi tokdisak.

¹⁴“Ji Kristo dakon man abidonj, anakwa ujun do amin da gen yokwi dayinba kanj, ji ujun do kisik kisik ani. Nido, Piŋkop dakon Wup tilimni wagil tagisisi jikon toso. ¹⁵Kanj kimotni. Amin dapba kimotni, bo yo kabo noni, bo anpak yokwi di ani, bo amin diwari dakon pi panjupbal ani, anakwa tepmi pani kanj, ujun tagi dima. ¹⁶Mani ji Kristo Dakon Amin ekwanj do anek tepmi pani kanj, mayagi dima nandani. Kristo dakon man ujun do but galaksi nandanej Piŋkop anjisini. ¹⁷Piŋkop da miŋat amin kabini nin gen pikon nipjak dakon bisap kili noman tak. Mibiltok ninon asak, do miŋat aminyo Piŋkop dakon Gen Bin Tagisi manji iman amin kabikon asak bisapmon kobogi yokwisi timitdanj. ¹⁸“Piŋkop dakon papia da yanj yosok:

“Yokwikon banj amin kilegi timit timit ujun jigisi, do Piŋkop manji iman amin gat yokwi pakpak gat nianj agagi?”

^v 4.7 Ro 13.11-12 ^w 4.8 1Pi 1.22 ^x 4.9 Ibr 13.2 ^y 4.10-11 Ro 12.6-8 ^z 4.13 Ya 5.41; Jem 1.2; 1Pi 1.6-7 ^a 4.14 1Pi 2.20 ^b 4.18 YT 11.31

¹⁹Do Piŋkop da galak togon amin diwari tepmi pani do nandisak kaŋ, uŋun amin egip egipni Piŋkop nin wasagit da kisiron yipmaŋek aŋpak tagisi baŋgin ak do. Uŋun da bisapmi bisapmi kilanin tagisi aŋkimokdok.

Kila amin ji Piŋkop dakon miŋat aminyo kilani tagisi ani

5 ¹Abisok nak paŋmuwukbi dakon kila amin gat gen yogogi. Nakyo kisi kila amin kinda. Naga da dabilon Kristo kaŋapbo tepmi pagit. Ae nak gat ji gat Kristo dakon tapmim ae man madep noman altosak bisapmon Piŋkop da yo tagisi nin morap kisi do nim do yagit uŋun timitdamaŋ. Kila amin ji pi yaŋ baŋ ani do dayisat. ²‘Ji Piŋkop dakon miŋat aminyo kila tagisi ani. Uŋun sipsip da yaŋ ji da kisiron ekwaŋ. Piŋkop da kisik kisigon da pi uŋun ani do nandisak. Do pi yaŋon da ani. Amin da tebai dayiŋba uŋun do aŋek pi di abam. Ae tomni timit dogin pi uŋun dima ani. Pi uŋun ak do galagi nandani. ³^dAmin madep dagaŋek Piŋkop da miŋat aminyo uŋun kisitjikon yopgut uŋun di pabiŋ yopbam. Ji aŋpak tagisi baŋ aŋakwa pindagek yolni. ⁴Yaŋ ani kaŋ, Sipsip Kila Amin Mibiltogi da altaŋ tenŋeosak bisapmon tomni wagil tagisi uŋun abidokdaŋ. Tomni toktok teban tosak ae dima tasik togi uŋun naŋ abidokdaŋ.

Nin egip egipnin Piŋkop da kisiron yipneŋ

⁵^eYawi kaluk ji kila amin da yoŋgamgwan egipni. Ji morap piŋbi egip egip yol kimagek Piŋkop dakon miŋat aminyo da yoŋgamgwan egipni. Nin nandamaŋ:

“Piŋkop da miŋat aminyo iyi dakon man pawikwaŋ uŋun pabiŋ yopmaŋdak.

Mani amin piŋbi ekwaŋ uŋun nandaŋ yawok yomiŋek yo tagisi aŋ yomisak.”

⁶^fDo disi dakon galaktok pabiŋ yopmaŋek Piŋkop tapmimi toŋ da yoŋgamgwan egipni. Yaŋ ani kaŋ, iyi nandisak bisap uŋudon ji paŋenotjak. ⁷^gPiŋkop da kilasi tagisi asak, do yo morap do nandaba kik aŋ uŋun kisitnikon yopni.

⁸^hJi kalugi egek disi do kila tagisi aŋek egipni. Sunduk uwalji uŋun laion yombem, uŋun da madepsi yaŋ tidaneŋ miŋat aminyo nok do wusisak. ⁹ⁱJi nandaŋ gadaron tebaisi agek paŋkilikban kaŋ geni dimasi nandani. Ji nandaŋ, Piŋkop dakon miŋat aminyo diwari miŋtimi miŋtimi ekwaŋ, uŋun ji da tepmi paŋ yaŋ gin paŋ.

^c 5.2 Jn 21.15-17; Ya 20.28 ^d 5.3 2Ko 1.24; Pil 3.17; Tit 2.7 ^e 5.5 YT 3.34; Ep 5.21; Jem 4.6 ^f 5.6 Mt 23.12; Lk 14.11; Jem 4.10 ^g 5.7 Mt 6.25-30 ^h 5.8 1Tes 5.6
ⁱ 5.9 Ep 6.11-13; Jem 4.7

¹⁰Piŋkop, nandaŋ yawot dakon mibili, uŋun da ji tilim gulgwani tagisi toktok teban tosok uŋudon iyi gat kisi egipni do aŋek Yesu Kristo obakon da ji yaŋ damgut. Bisap piŋpimisok gin tepmi pakdaŋ, mani don iyi nandaŋ gadatji paŋteban aban toktogisi tebaisi atdaŋ. ¹¹Uŋun kalongin dagok dagogi mini tapmim morap kisi taŋ imisak. Uŋun asi.

Gen diwari

¹²JSailas, nak da koko uŋun Yesu yolyol notnosi, ae pi bamisi gin asak, uŋun da nak aŋpulugaŋban gen piŋpimi on ji do mandisat. Nak ji dakon but paŋteban akdo, ae Piŋkop dakon nandaŋ yawotni bisapmi bisapmi jikon tosok uŋun dolik do aŋek papia on mandisat. Ji uŋun do nandaŋek tebaisi atni.

¹³^kPaŋmuwukbi miŋat aminyo Babilon^l ekwaŋ, uŋun miŋat aminyo Piŋkop da ji gat kisi kili manjigit, uŋun da gildat tagi yaŋ dayaŋ. Monjino Mak yo kisi da gildat tagi yaŋ dayisak. ¹⁴Paŋmuwukbi diwari do but dasi galak taŋ yomaŋ yaŋ yolikdo, kisitni iligek si bedoni.

Kristokon gadaŋbi amin morap butji yawori tosak do bisit asat.

^j 5.12 Ya 12.2,25; 13.13; 15.22,37-40 ^k 5.13 Ya 12.2; 2Ti 4.11 ^l 5.13 Amin diwari da Babilon uŋun Rom kokup pap do yosok yaŋ nandaŋ.